

## ВОСКРЕСНА СЛУЖБА 8 ГЛАСА

### В СУББОТУ НА ВЕЛИЦЕЙ ВЕЧЕРНИ.

На Господи, **возвах**, поставим стихов 10, и поем стихиры воскресны осмогласника, 3: и Анатолиевы, 4: и миней 3, или 4, или 6, аще празднуется святой. Слава, миней, и ныне, Богородичен гласа.

### Стихиры воскресны, глас 8:

**Стих:** Изведи из темницы душу мою, \* исповедатися Имене Твоему.

Вечернюю песнь, / и словесную службу, / Тебе Христе приносим, / яко благоволил еси помиловати нас / Воскресением.

**Стих:** Мене ждут праведницы, \* дондеже воздаси мне.

Господи, Господи, не отвержи нас / от Твоего лица, / но благоволи помиловати нас / Воскресением.

**Стих:** Из глубины возвах к Тебе, Господи, \* Господи, услыши глас мой.

Радуйся, Сионе Святой, / мати церковей, Божие жилище: / ты бо приял еси первый оставление грехов / Воскресением.

### Ины стихиры Анатолиевы, глас тойже:

**Стих:** Да будут уши Твои внимлюще \* гласу моления моего.

Еже от Бога Отца Слово, / прежде век Рождшееся, в последняя же времена, / Тоежде от Неискусобрачныя воплощенное волею, / распятие смертное претерпе: / и древле умерщвленнаго человека спасе / Своим Воскресением.

**Стих:** Аще беззакония назриши, Господи, Господи, кто постоит; \* яко у Тебе очищение есть.

Еже из мертвых / Твое Воскресение славословим Христе, / имже свободил еси Адамский род от адова мучительства: / и даровал еси миру яко Бог жизнь вечную / и велию милость.

**Стих:** Имене ради Твоего потерпех Тя, Господи, потерпе душа моя в слово Твое, \* упова душа моя на Господа.

Слава Тебе, Христе Спасе, / Сыне Божий Единородный, / пригвоздивыйся на Кресте, / и воскресый из гроба тридневен.

**Стих:** От стражи утренняя до ночи, от стражи утренняя, \* да уповает Израиль на Господа.

Тя славим, Господи, / волею нас ради Крест претерпевшаго, / и Тебе поклоняемся Всесильне Спасе, / не отвержи нас от Лица Твоего: / но услыши и спаси нас / Воскресением Твоим / Человеколюбче.

**Таже минеи стихиры святому.**

**Слава святому, аще имать.**

**Аще ли ни, Слава, и ныне, Богородичен.**

**Царь** Небесный, за человеколюбие на земли явися, / и с человеки поживе: / от Девы бо Чистыя плоть приемый, / и из Нея прошедый с восприятием. / Един есть Сын, сугуб естеством, / но не Ипостасию. / Темже совершенна Того Бога и совершенна Человека / воистину проповедающе, / исповедуем Христа Бога нашего: / Егоже моли Мати Безневестная, / помиловатися душам нашим.

**Таже: Свете Тихий: Прокимен и прочая.**

**На стиховне, стихиры воскресны, глас 8:**

**Возшел** еси на Крест Иисусе, / снизшедый с Небесе, / пришел еси на смерть, Животе Безсмертный, / сущым во тьме Свет истинный, / к падшым всех Воскресение: / просвещение и Спасе наш, слава Тебе.

**Ины стихиры, по алфавиту.**

**Стих: Господь** воцарися, \* в лепоту облечеса.

**Христа** славословим, воскресшаго от мертвых: / душу бо и тело прием, / страсти отъобуюду отсече, / пречистей убо души во ад сошедшей, / егоже и плени: / во гробе же истления не виде святое тело, / Избавителя душ наших.

**Стих: Ибо** утверди вселенную, \* яже не подвижится.

**Псалмы** и песньми славовловим, Христе, / от мертвых Твое Воскресение: / имже нас свободил еси мучительства адова, / и яко Бог даровал еси жизнь вечную / и велию милость.

**Стих: Дому** Твоему подобает святыня, \* Господи, в долготу дней.

**О,** Владыко всех Непостижиме, / Творче небесе и земли, / крестом пострадавый, мне безстрастие источил еси: / погребение же прием, и воскрес во славе, / совоскресил еси Адама рукою всесильною. / Слава Твоему тридневному востанию, / имже даровал еси нам вечную жизнь, и очищение грехов, / яко Един Благоутробен.

**Слава, минеи, аще есть. Аще ли ни, Слава, и ныне, Богородичен:**

**Безневестная** Дево, / Яже Бога неизреченно заченши плотию, / Мати Бога Вышняго, / Твоих рабов мольбы прими, Всенепорочная, / всем подаючи очищение прегрешений: / ныне наша моления приемлющи, / моли спастися всем нам.

**Таже, Ныне** отпускаеши: **Трисвятое. И по Отче наш:**

**Тропарь воскресен, глас 8:**

**С** высоты снизшел еси, Благоутробне, / погребение приял еси тридневное, / да нас свободиши страстей, / Животе и Воскресение наше, Господи, слава Тебе.

## **Богородичен:**

**И**же нас ради Рождейся от Девы, / и распятие претерпев, Благий, /  
испровергий смертию смерть, и Воскресение явлей, яко Бог, / не презри, яже  
создал еси рукою Твоею, / яви человеколюбие Твое, Милостиве, / прими  
Рождшую Тя Богородицу, молящуюся за ны, / и спаси, Спасе наш, люди  
отчаянные.

## **В СУББОТУ НА ПОВЕЧЕРИИ,**

### **Канон молебный Пресвятей Богородице. Глас 8:**

#### **Песнь 1**

**Ирмос:** Поим Господеви, / проведшему люди Своя сквозе Чермное море, / яко Един славно прославися.

**Припев:** Пресвятая Богородице спаси нас.

Приидите тайно братие, яко от начала Святей Богородице, внесем вернии песнь нову, днесь похваляюще величия Ея.

Древле боговидением Моисей озарився умом, Твоему ясно научашеся Чистая, боголепному зачатю, паче естества Дево, явльшуся ему в купине саду.

**Слава:** Тебе предлагаю сердечная деяния, и приятно подаю писание, близ сущий божественный заступления кров, ко Владыце Христу Тебе предложив.

**И ныне:** Приклони ми ухо Твое Чистая, православною верою, в сени лица Твоего, честно любовию Ти притекающему, и страхом поклоняющуся, молебный мой глас услыши.

#### **Песнь 3**

**Ирмос:** Ты еси утверждение притекающих к Тебе, Господи: / Ты еси свет омраченных, / и поет Тя дух мой.

Лествица древле патриархова Тя проображаше, Пренепорочная: ангельско бо являше снитие Божие к нам, Божественное сошествие во утробе Твоей.

Иудово колено вселися, юже Иаков прорече, от колена его прорастити избавление, Иисуса Христа: Егоже Ты рождши Пречистая, прославилася еси.

**Слава:** Грехми отчаян, обретох Тя пристанище спасения Пречистая Богородице, упование наше и помощи: темже мя к покаянию настави.

**И ныне:** Близ Тя сущу Владыки имам, Преславная Владычице, деяний моих книгу возложих на Тя верою: не премолчи ущедрити мя.

#### **Песнь 4**

**Ирмос:** Из горы приосененная Слове, пророк, / Единя Богородицы, / хотяща воплотитися, / боговидно усмотри, / и со страхом славословяше / силу Твою.

Ты яко мнисты златыми одеяна Невеста Отча, благодать приемши, украшшися добротою девства, Мати явилася еси Сына Божия.

Тя истинный Сион, Христос Слово, изволи Себе в Божественное Селение, яко избранну избрав Богородице, на обновление всего мира.

**Слава:** Радуйся, красная палато Слова, девственный чертоже Царя: радуйся, похвало всех безплотных: радуйся, человек Помоще.

**И ныне:** Удаляются от Бога, темже и погибают, отметающие образы Сына Твоего, Мати Божия Дево Богородице: имиже спасаются чтущии Тя.

### **Песнь 5**

**Ирмос:** Мрак души моя разжени Светодавче Христе Боже, / началородную тьму изгнав бездны: / и даруй ми свет повелений Твоих Слове, / да утренюю славлю Тя.

**С** божественным сошедшеся Гавриилом, возопиим Богородице верно: радуйся Дево Святая, Благодатная, Господь с Тобою, Иже Тебе ради потребив печаль, подаде радование.

Пречистое Твое чрево Гедеон виде Дево Чистая, в неже яко дождь Слово сошед, воплотися Божественным Духом, Отча неразлучен сый Божества.

**Слава:** Помощница мира, и Заступница еси человек грешных, Богородительнице Дево: и верою и любовью прибегающим к Тебе, пременение спасительное, и решило прегрешений многих.

**И ныне:** Прорастила еси без семене, Иже прежде всякия твари, прозябение Сына Отча, безлетно же и безначально, Духом Божественным, Богородительнице Чистая: Егоже подобие вида вси почитаем.

### **Песнь 6**

**Ирмос:** Содержима мя прими Человеколюбче, / грехи многими, / и припадающа щедротам Твоим, / яко пророка Господи, / и спаси мя.

Девства Тя зеркало сушо, и приятелище чисто Божества восхваляем, Дево Неискусобрачная, песньми.

**Бог** во утробе Твоей воплотися, безстрастно и ужасно Богоневесто, якоже в свитце нове писан перстом Отчим.

**Слава:** Очищение имамы покров Твой, и известную надежду и заступление, Дево Чистая: не посрами Владычице рабы Твоя.

**И ныне:** Страстей неуставное бешение, предстанием Твоим Богоневесто, устави в тишину: и ко пристанищу настави нас тишины.

**Таже:** Господи помилуй, трижды. **Слава, и ныне:**

### **Кондак, глас 8:**

**Взбранной** Воеводе победительная, / яко избавльшися от злых, / благодарственная восписуем Ти раби Твои Богородице: / но яко имущая державу непобедимую, / от всяких нас бед свободи, да зовем Ти: / радуйся Невесто невестная.

## Песнь 7

**Ирмос:** Божия снизхождения огонь / устыдися в Вавилоне иногда, / сего ради отроцы в печи радованною ногою, / яко во цветнице ликующе, пояху: / благословен еси Боже отец наших.

Радости наша Ходатаица явилася еси Дево, и благодати приносяще венец любовию, радуйся, вопием Ти, Благословенная Чистая, похваляюще.

Гора Святая еси Божия приосененная, гора тучна Пренепорочная: гора усыренна Божественными сиянии: гора, в Нейже Бог благоволи жити.

**Слава:** Побеждай благодать Твою несть грех, Матерне бо дерзновение и волю имаши, и решиши прегрешения молитвами Твоими, и преводиши вся стремления.

**И ныне:** От Троицы родила еси Единого, Богородице, бывша непреложна плотским соединением, сугуба суца естеством: Егоже вида образ почитаем.

## Песнь 8

**Ирмос:** На горе святей прославльшася, / и в купине огнем Приснодевы / Моисеови тайну явльшаго, / Господа пойте, / и превозносите во вся веки.

Кадильница явилася еси пророку, Божественного угля суци, грехи отъемлющаго, Богородице Дево Мати Бога нашего.

Даниил провиде Тя гору велию, Богородице Дево: из Нейже честный камень Христос, плотию облечеса, и лести низложи идольския храмы.

**Слава:** Великий кит ищет пожрети мя, лютаго греха и страстей моих отчаяния: но предвари и спаси раба Твоего Владычице.

**И ныне:** Иже Тобою беседовавый к человеком, Бог сый всяческих, зрак человека восприят: Егоже взор почитаем Дево, в писаниих.

## Песнь 9

**Ирмос:** Воистинну Богородицу / Тя исповедуем / спасеннии Тобою Дево Чистая, / с безплотными лики Тя величающе.

Вертоград затворен Тя Дево Богородице, и запечатан источник Духом Божественным, премудрый в песнях поет: темже яко сад жизни, воплощается Христос.

Твоего несказаннаго Рождества прописуя пророк, книгу запечатану провиде, еже никтоже таинство разуме, вочеловечения рождества Твоего.

**Слава:** Тебе во умилении души молимся вси: не презри Владычице наша мольбы, но буди благоуветлив нам покров, и молитву нашу услыши.

**И ныне:** Твоему и Сына Твоего припадаю образом: и сомнящихся почитати, яко манентовы лжы отметаю, Богородице Дево: темже православно песнь скончаваю.

**Таже, Достойно** есть: **Трисвятое. И по Отче** наш: **кондак, и прочее по обычаю, и отпуст.**

## НА ПОЛУНОЩНИЦЕ,

**Канон ко Святей и Живоначальной Троице, егоже краестрочие:**

Троице Единице, спаси мя Твоего раба. **Глас 8:**

**Творение Митрофаново.**

### Песнь 1

**Ирмос:** Колесницегонителя фараоня погрузи, / чудотвори ииногда / моисейский жезл, крестообразно поразив, / и разделив море: / Израиля же беглеца пешеходца спасе, / песнь Богуи воспевающа.

**Припев:** Пресвятая Троице Боже наш, слава Тебе.

Трисолнечному Царю, и Строителю, и Промыслителю всяческих, и Благому Единому, Естественне Сущему, и Единственную имущему Божества славу, Богу Единоначальному припадаем, песнь Трисвятую поюще.

Речения Божественная, и пророчества яже свыше помняще яве, Богоначальное Естество Единственное славим, Присносущное, Собезначальное, в Трех Лицах, Отце, и Сыне, и Дусе, Содетельное, Всесильное.

Священнотаинник Авраам быв, священнообразно древле, Творца всех и Бога и Господа, в Трех убо Ипостасех прият радуясь, и Трех Ипостасей державу единственную позна.

**Богородичен:** Неискусобрачно Христа родила еси, Еже по нам, нас ради восприемша естество Пречистая, и Непреложна по обою пребывша. Егоже моли непрестанно, грехов ми даровати и искушений избавление.

### Песнь 3

**Ирмос:** Утвердей в начале небеса разумом, / и землю на водах основавай, / на камени мя Христе заповедей Твоих утверди, / яко несть свят паче Тебе, Едине Человеколюбче.

Тебе Непреступнаго Бога и Царя славы на престоле Исаиа виде висоце, и херувимы и серафимы славящия непрестанными песньми, Единственнаго Триипостаснаго.

Единаго от Отца яко от ума рожденнаго Слова, и Духа происходяща неизглаголанно, по коемуждо помышлении, и книжными учении постигше, Единаго Бога Трисолнечнаго почитаем.

Иже сый Нерожденный Отец, и Своего Существа сияние родив нетленно Сына, Свет от Света: исходне предлагает срасленный Свет Духа, Вседетельна, и Единочестна.

**Богородичен:** Храм явилася еси чист, Дево Мати Марие, вся всесильно и премудро составльшему Христу, и в чине положшему и носящему: Егоже Милостива ми сотвори Матерними Твоими молитвами.

Господи помилуй, **трижды.**

**Таже, седален, глас 8:**

**Подобен:** Повеленное тайно:

Трисолнечнаго и Честнаго Богоначалия силу / вернии ныне восхвалим, / яко манием токмо вся составил / вышня я ликостояния ангельская, / и нижняя священноначалия церковная, еже взывати: / Свят, Свят, Свят еси Боже Преблагий: / слава и пение державе Твоей.

**Слава, и ныне, Богородичен:**

Яже Непременнаго Бога породшая, / прменяемое присно сердце мое грехом и леностию, / прилогми льстиваго, / утверди Благая молитвами Матерними Твоими: / яко да и аз благодарно славлю Тя Богородительнице Марие, / помилуй стадо Твое, еже стяжала еси, / Всенепорочная.

**Песнь 4**

**Ирмос:** Ты моя крепость Господи, / Ты моя и сила, / Ты мой Бог, / Ты мое радование, / не оставль недра Отца, / и нашу нищету посетив. / Тем с пророком Аввакумом зову Ти: / силе Твоей слава Человеколюбче.

Восток явльшия Божества сущым во тьме, всю разгна неслетлую ночь страстей: и правды Солнце возсия, Просто убо по Существо, Трисиянно же Лицы: Еже поем присно, и славим.

Серафимскими усты воспеваемаго, бренными устнами славим Единственнаго, и Троичнаго Господа славы, Естеством и Ипостасьми, вопиюще: О Всецарю, Твоим рабом подаждь различных прегрешений прощение!

Содержительная всех сущих, Невидимая, Всещедрая, Благоутробная, Человеколюбивая Троице Честная, и Богоначальная, не забуди мене Твоего раба в конец: ниже разори иже завещал еси Твоим рабом завет, за неизреченную милость.

**Богородичен:** Красную Тя Всечистая, Едину обрет от века доброту Иаковлю, Пребезначальное Слово, и вселися в Тя благоутробия ради, обнови человеческое естество: Егоже моли непрестанно, от всякия мне избавитися скорби.

**Песнь 5**

**Ирмос:** Вскую мя отринул еси / от лица Твоего Свете незаходимый, / и покрыла мя есть чуждая тьма окаяннаго: / но обрати мя, и к свету заповедей Твоих / пути моя направи, молюся.

Соприсносущная Три Лица славим, Единаго же Господа, Тя Божественное Естество, разделяюще просто, и совокупающе, и верно вопием: Богоначальная Троице Святая, Твоя рабы от скорби избави.

**Р**ыдаю зельне за немощь мысли моя, како не хотя стражду невольное воистинну изменение; сего ради зову: Живоначальная Троице Святая, добрых в стоянии мя учини.

**Д**реманием отягчена мя греховным, и пореваема в сон смертный, яко Человеколюбивая и Преплагая, и Всемиловитая, Богоначальная Троице Святая, ущедри и возстави мя.

**Богородичен:** Мати Дево Отроковице, Пречистая, Всенепорочная, Богоблагодатная, Твоими молитвами Сына и Бога Твоего и Господа милостива сотвори мне: и страстей, и прегрешений Твоего раба избави вскоре.

### **Песнь 6**

**Ирмос:** Очисти мя Спасе, / многа бо беззакония моя, / и из глубины зол возведи, молюся: / к Тебе бо возопих, и услыши мя, / Боже спасения моего.

**Н**ебесных умов чиноначалия подражающе, Единоначальная всех Троице Пресущественная, Трисвятыми песньми Тя славословим, бранными нашими усты.

**И**же по образу Твоему человека создавшему, и от не сущих все премудро составльшему, Богу Триипостасному поклоняюся, и чту, и пою, и величаю Тя.

**В**седержителю Боже, и Едине Неопределенный, вселися в мя за неизреченную милость, Трисолнечный Владыко: и озари мя, и вразуми, яко Благоутробен.

**Богородичен:** Храм явилася еси Бога Невместимаго Пречистая, храм и мене Того покажи, Божественная благодати Пресвятая Владычице, Твоими мольбами, и соблюди невредима.

**Г**осподи помилуй, **трижды.**

### **Седален, глас 8:**

**Подобен:** Повеленное тайно:

**О**тца Безначальна вернии, / Сына Собезначальна, и Духа Божественнаго / воистинну песнословим, / Неслиянне, Непреватне и Неизменне, / Троицу Просту, и Святу, и Сраслену, / вопиюще со ангелы: / Свят еси Отче, / Сыне, со Духом Пресвятым и Честным. / Помилуй, яже создал еси по образу Твоему, / Владыко.

### **Слава, и ныне, Богородичен:**

**Б**лагодарим Тя присно Богородице, / и величаем Чистая, / и поклоняемся, воспевающе рождество Твое Благодатная, / вопиюще непрестанно: / спаси нас Дево Премилостивая, / яко Благая в час испытания, / да не посрамлени будем раби Твои.

## Песнь 7

**Ирмос:** Божия низхождения / огонь устыдися в Вавилоне иногда, / сего ради отроцы в печи радованною ногою, / яко во цветнице ликующе пояху: / благословен еси Боже отец наших.

Премудростию неизглаголанною Твоею, и пучиною благостыни, туне Твоего раба помилованна покажи мя: и ныне, якоже древле, избави озлобления, Троице Единице Боже, грехов и страстей. **[Дважды.]**

Ум Нерожденный Отец, и Слово рождаемое от Него, и Дух Божественный, непостижне Исходен сый, Боже Единоначальне, Трисолнечне, пою Тебе: благословен Бог Отец наших.

**Богородичен:** Умерщвлен бых Пречистая, греховным ядом напоен, и притекаю к Тебе верою, рождшей Начальника живота: Твоими молитвами раба Твоего оживи, и искушений и страстей избави, Едина Чистая.

## Песнь 8

**Ирмос:** Седмерицею пещь халдейский мучитель / богочестивым неистовно разжже, / силою же лучшею спасены сия виде, / Творцу и Избавителю вопиаше: / отроцы благословите, / священницы воспойте, / людие превозносите во вся веки.

Свет сый Незаходим, Трисиянен и Трисолнечный и Единоначalen, Самодержавен, Простейший, Бог Непостижимый, и Самодержавен Господь, ныне темное и омраченное мое сердце озари: и покажи светозарно и светоносно пети Тя, и славити во вся веки.

Священнейшими крилы, серафими Божественнейшии, лица и ноги благоговейно покрывают, славы не терпяще непостижимыя доброты Твоя, Благоначальная, Богоначальная, Единоначальная Троице Пресвятая: обаче и мы воспевати Тя дерзаем, и славити верно во веки.

Господоначалие Безначальное, Всесильную и Преплагу, Совершеннoначальну, Благодейственну, Неопредельну, Вину Невинoвну, Творительну, Присносущну, Промыслительну и спасительную всем Единицу по Существу, и Троицу Лицы, славлю Тя Боже мой, верно во веки.

**Богородичен:** На земли возсия Невечернее Солнце, рождеством Еже из Тебе девственным, Пречистая Владычице, и человеки избави от идольскаго помраченнаго мрака. Темже и ныне мя паче Того Богоначалия озари лучами, и соблюди Твоего раба.

## Песнь 9

**Ирмос:** Ужасеся о сем небо, / и земли удивишася концы, / яко Бог явися человеком плотски, / и чрево Твое бысть пространнейшее небесе. / Тем Тя Богородицу, / ангелов и человек чиноначалия величают.

**Иже** всеми царствующее, и Вседетельное Преначальное Естество, Вышшелетную, Живоначальную, Благоутробну, Человеколюбивую, Благую, Единоначальную Троицу Тя ныне славословяще, грехов прощения просим, мирови мира, и церквам единомыслия. **[Дважды.]**

**Едино** Господство и Трисиянное, Единственное Богоначалие Трисолнечное, певцы приими Твоя боголепно, и прегрешений избави, и искушений и лютых: и вскоре мир подаждь человеколюбно, и церквам соединение.

**Богородичен:** Во утробу Христе Спасе мой, Девическую вселься, явился еси миру Твоему Богомужно, Непревратен, Неслиянен воистинну: и обещал еси всегда с Твоими рабы быти яве. Темже Тебе рождшия молитвами, мир всему стаду Твоему устрой.

**Посем припевы Григория Синаита:** Достойно есть: **И прочее полунощницы, писано в конце книги сея.**

## НА УТРЕНИ

**По шестопсалмии Бог Господь, на глас 8 ый глаголем тропарь воскресный, дважды, и Богородичен единожды, писаны на велицей вечерни. Также обычное стихословие псалтиря.**

### **По 1-м стихословию седальны воскресны, глас 1:**

Воскресл еси из мертвых / Животе всех, / и ангел светел женам вопияше: / престаните от слез, апостолом благовестите, / возопийте поюща: яко воскресе Христос Господь, / благоволивый спасти яко Бог род человеческий.

**Стих:** Воскресни Господи Боже мой, да вознесется рука Твоя, \* не забуди убогих Твоих до конца.

Воскресый из гроба яко воистинну, / преподобным повелел еси женам проповедати востание апостолом, / якоже писано есть: / и скорый Петр предста гробу, / и свет зря во гробе, ужасашся. / Темже и увидев плащаницы, / кроме Божественнаго тела в нем лежащия, / со страхом возопи: / слава Тебе Христе Боже, / яко спасаеши вся Спасе наш: / Отчее бо еси сияние.

### **Слава, и ныне, Богородичен:**

Небесную дверь, / и кивот, всесвятую гору, / светозарный облак воспоим, / небесную лествицу, / словесный рай, / Евино избавление, / вселенная вся великое сокровище, / яко спасение в Ней соделася миру, / и оставление древних согрешений. / Сего ради вопием Ти: / моли Сына Твоего и Бога, / прегрешений оставление даровати, / благочестно поклоняющимся / пресвятому рождеству Твоему.

### **По 2-м стихословию седальны воскресны, глас 8:**

Человецы Спасе, / гроб Твой запечаташа: / ангел камень от дверей отвали: / жены видеша воставша от мертвых, / и тыя благовестиша учеником Твоим в Сионе, / яко воскресл еси Животе всех, / и разрешишася узы смертныя: / Господи слава Тебе.

**Стих:** Исповемся Тебе Господи всем сердцем моим, \* подем вся чудеса Твоя.

Мура погребательная / жены принесша, / глас ангельский из гроба слышаху: / престаните от слез, и вместо печали радость примите, / возопийте поюща: / яко воскресе Христос Господь, / благоволивый спасти яко Бог род человеческий.

### **Слава, и ныне, Богородичен, не сидяще поем, но стояще, и со страхом и благоговением:**

О Тебе радуется Благодатная всякая тварь, / ангельский собор, и человеческий род, / освященный храм, и раю словесный: / девственная похвало, / из Неяже Бог воплотися, / и Младенец бысть, прежде век сый Бог наш: / ложесна бо Твоя престол сотвори, / и чрево Твое пространнее небес содела. / О Тебе радуется, Благодатная, всякая тварь, / слава Тебе.

**Таже, Блажени непорочнии:**

**Посем тропари: Ангельский собор:**

**Ипакои, глас 8:**

**М**уриносицы Жизнодавца предстояща гробу, Владыку искаху в мертвых Безсмертнаго, и радость благовещения от ангела приемша, апостолом возвещаху: яко воскресе Христос Бог, подай мирови велию милость.

**Степенна, глас 8: Ихже стихи повторяюще поем.**

**Антифон 1:**

**О**т юности моя враг мя искушает, / сластьми палит мя: / аз же надеяся на Тя Господи, / побеждаю сего.

**Н**енавидящий Сиона, / да будут убо прежде исторжения яко трава: / ссечет бо Христос выя их, / усечением мук.

**Слава: С**вятым Духом, Еже жити всяческим: / Свет от Света, Бог Велик: / со Отцем поем Ему, и с Словом.

**И ныне, тойже.**

**Антифон 2:**

**С**ердце мое страхом Твоим / да покрывается смиреномудрствующее: / да не вознесшееся отпадет / от Тебе Всещедре.

**Н**а Господа имевый надежду, / не устрашится тогда, / егда огнем вся судити имать, / и мукою.

**Слава: С**вятым Духом, всяк кто божественный видит, / и предглаголет, / чудодействует вышня, в Триех Единаго Бога поя: / аще бо и трисияет, / единоначальствует Божество.

**И ныне, тойже.**

**Антифон 3:**

**В**оззвах Тебе Господи, / вонми, приклони ми ухо Твое вопиющу, / и очисти, прежде даже не возмеш / мене отсюда.

**В** матери своей земли отходяй всяк, / паки разрешается, / прияти муки, / или почести поживших.

**Слава: С**вятым Духом богословие, / Единица Трисвятая: / Отец бо Безначален: / от Негоже родися Сын безлетно, / и Дух Сопрестолен, / Сообразен, от Отца спросиявший.

**И ныне, тойже.**

**Антифон 4:**

**С**е ныне что добро, / или что красно; / но еже жити братии вкупе: / в сем бо Господь обеща живот вечный.

**О** ризе своей, / Иже крины сельныя украшая, / повелевает, / яко не подобает пещися.

**Слава:** Святым Духом, Единовидною виною, / вся содержатся мироподательне: / Бог бо Сей есть, Отцу же и Сынови Единосущен / Господственне.

**И ныне, тойже.**

**Прокимен, глас 8:**

**Воцарится** Господь во век, \* Бог твой Сионе, в род и род.

**Стих:** Хвали душе моя Господа, восхваляю Господа в животе моем.

**Всякое дыхание:**

**Евангелие утреннее рядовое.**

**Воскресение** Христово видеvше, / поклонимся Святому Господу Иисусу, / Единому Безгрешному. / Кресту Твоему поклоняемся Христе, / и Святое Воскресение Твое поем и славим: / Ты бо еси Бог наш, / разве Тебе иного не знаем, / Имя Твое именуем. / Приидите вси вернии, / поклонимся Святому Христову воскресению: / се бо прииде Крестом радость всему миру. / Всегда благословяще Господа, / поем Воскресение Его: / распятие бо претерпев, / смертью смерть разруши.

**Псалом 50:** Помилуй мя Боже:

**Слава:** / Молитвами апостолов, / Милостиве, очисти / множества согрешений наших.

**И ныне:** / Молитвами Богородицы, / Милостиве, очисти / множества согрешений наших.

**Таже, глас 6:** Помилуй мя Боже / по велицей милости Твоей, / и по множеству щедрот Твоих / очисти беззаконие мое.

**Посем стихира:**

**Воскрес** Иисус от гроба, / якоже прорече, / даде нам живот вечный, / и велию милость.

**Спаси** Боже люди Твоя:

**И возглас:** Милостию и щедротами и человеколюбием:

## **Канон воскресен. Глас 8:**

### **Песнь 1**

**Ирмос:** Колесницегонителя фараоня погрузи, / чудотворишь иногда / моисейский жезл, крестообразно поразив, / и разделив море: / Израиля же беглеца, пешеходца спасе, / песнь Богови воспевающа.

**Припев:** Слава Господи святому Воскресению Твоему.

Всесильну Христову Божеству како не дивимся; от страстей убо всем верным, безстрастие и нетление точащу, от ребра же святого источник бессмертия искапающе, и Живот из гроба Присносущный.

**Припев:** Слава Господи святому Воскресению Твоему.

Яко благолепен женам ангел ныне явился, светлыя нося образы естественныя невестественныя чистоты, зраком же возвещая свет воскресения, зовый: воскресе Господь.

**Припев:** Пресвятая Богородице спаси нас.

**Богородичен:** Преславная возглаголашася о Тебе в родех родов, Бога Слова во чреве вмещая, чиста же пребывши Богородице Марие. Темже Тя вси почитаем, сущее по Бозе заступление наше.

### **Канон крестовоскресен.**

**Ирмос:** Воду прошел яко сушу:

**Припев:** Слава Господи Кресту Твоему честному и Воскресению.

Взяшася врата болезненная, и ужасошася вратницы адовы, зряще в преисподнейшая Сошедшаго, Иже на высоте всех превыше естества.

**Припев:** Слава Господи Кресту Твоему честному и Воскресению.

Удивишася чини ангельстии, зряще на престоле посаждено Отчи, отпадшее естество человеческое, затвореное в преисподних земли.

**Припев:** Слава Господи Кресту Твоему честному и Воскресению.

Чини Тя ангельстии и человечестии, Безвестная Мати, хвалят непрестанно: Зиждителя бо сих, яко Младенца на объятиих Твоих носила еси.

### **Ин канон Пресвятей Богородице.**

**Ирмос:** Поим Господеви, / проведшему люди Своя сквозе Чермное море, / яко Един славно прославися.

**Припев:** Пресвятая Богородице спаси нас.

Пречистая Богородице, воплощенное Присносущное и Пребожественное Слово, паче естества рождши, поем Тя.

**Припев:** Пресвятая Богородице спаси нас.

Грозд Тя Живоносен, всемирнаго искапающ сладость спасения, Дева Христе роди.

**Припев:** Пресвятая Богородице спаси нас.

Род Адамль, ко еже паче ума блаженству, Тобою возведенный Богородице, достойне славит Тя.

**Катавасия:** Отверзу уста моя:

### Песнь 3

**Ирмос:** Утвердей в начале небеса разумом, / и землю на водах основавый, / на камени мя, Христе, заповедей Твоих утверди, / яко несть свят, паче Тебе Едине Человеколюбче.

**Припев:** Слава Господи святому Воскресению Твоему.

Осуждена бывша Адама вкушением греха, плоти Твоя спасительною страстию оправдал еси Христе: Сам бо неповинен смертнаго искуса был еси Безгрешне.

**Припев:** Слава Господи святому Воскресению Твоему.

Воскресения свет возсия сущым во тьме, и сени смертной сидящим, Бог мой Иисус, и Своим Божеством крепкаго связав, сего сосуды расхитил есть.

**Припев:** Пресвятая Богородице спаси нас.

**Богородичен:** Херувимов и серафимов превышши явилася еси Богородице: Ты бо Единая прияла еси Невместимаго Бога в Твоем чреве, Нескверная: темже Тя вернии вси песньми Чистая, ублажаем.

### Ин, Кресту :

**Ирмос:** Небеснаго круга Верхотворче Господи:

**Припев:** Слава Господи Кресту Твоему честному и Воскресению.

Отвергшагося прежде заповеди, Господи, изриновена мя от Тебе сотворил еси, в негоже вообразився, послушанию же навек, Себе паки наздал еси распятием.

**Припев:** Слава Господи Кресту Твоему честному и Воскресению.

Премудростию вся проуведевый Господи, и разумом Твоим водрузивый преисподняя, не не сподобил еси снизхождением Твоим Слове Божий, воскресити, еже по образу Твоему.

**Припев:** Пресвятая Богородице спаси нас.

**Богородичен:** Вселився в Деву телесне Господи, явился еси человеком, якоже подобаше видети Тебе: Юже и показал еси яко истинную Богородицу, и верных Помощницу, Едине Человеколюбче.

## **Ин, Богородице :**

**Ирмос:** Ты еси утверждение притекающих к Тебе, Господи: / Ты еси свет омраченных, / и поет Тя дух мой.

**Припев:** Пресвятая Богородице спаси нас.

Даждь нам помощь Твоими молитвами Всечистая, прилоги отражающи лютых обстоятельств.

**Припев:** Пресвятая Богородице спаси нас.

Еве праматери Ты исправление была еси, Начальника жизни мирови, Христа Богородице рождши.

**Припев:** Пресвятая Богородице спаси нас.

Препояши мя силою Всечистая, Яже воистинну Бога рождши плотию, Отчую Ипостасную силу.

## **Песнь 4**

**Ирмос:** Ты моя крепость Господи, / Ты моя и сила, / Ты мой Бог, / Ты мое радование, / не оставль недра Отча, / и нашу нищету посетив. / Тем с пророком Аввакумом зову Ти: / силе Твоей слава Человеколюбче.

**Припев:** Слава Господи святому Воскресению Твоему.

Ты врага суща мя зело возлюбил еси: Ты истощанием странным сошел еси на землю, Благоутробне Спасе, последняго моего досаждения не отвергся, и пребыв на высоте пречистыя Твоя славы, прежде безчестованнаго прославил еси.

**Припев:** Слава Господи святому Воскресению Твоему.

Кто зря Владыко, ныне не ужасается, страстию смерть разрушаему; Крестом бежащее тление, и смертью ад богатства истощаваемый, Божественною силою Тебе распятаго; чудно дело, Человеколюбче!

**Припев:** Пресвятая Богородице спаси нас.

**Богородичен:** Ты верным похвала еси Безневестная, Ты Предстательнице, Ты и прибежище христиан, стена и пристанище: к Сыну бо Твоему мольбы носиши Всенепорочная, и спасаеши от бед, верою и любовью Богородицу Чистую Тебе знающих.

## **Ин, Кресту :**

**Ирмос:** Услышах, Господи, / смотрения Твоего таинство, / разумех дела Твоя / и прославих Твое Божество.

**Припев:** Слава Господи Кресту Твоему честному и Воскресению.

На Кресте Тя пригвоздиша законопреступных дети, Христе Боже: имже спасл еси яко Благоутробен, славящыя Твоя страдания.

**Припев:** Слава Господи Кресту Твоему честному и Воскресению.

Воскрес от гроба, вся совоскресил еси сущия во аде мертвья, и просветил еси яко Благоутробен, славящия Твое воскресение.

**Припев:** Пресвятая Богородице спаси нас.

**Богородичен:** Бога, Егоже родила еси Пречистая Марие, Того моли даровати рабом Твоим согрешений прощение.

### **Ин, Богородице :**

**Ирмос:** Услышах, Господи, / смотрения Твоего таинство, / разумех дела Твоя / и прославих Твое Божество.

**Припев:** Пресвятая Богородице спаси нас.

Клас возрастившая животворный, неоранная ниво, подающаго мирови жизнь, Богородице, спасай поющия Тя.

**Припев:** Пресвятая Богородице спаси нас.

Богородицу Тя Всечистая, просвещшиися вси проповедуем: Солнце бо правды родила еси Приснодево.

**Припев:** Пресвятая Богородице спаси нас.

Очищение даруй нашим неведением, яко Безгрешен: и умири мир Твой Боже, молитвами рождшия Тя.

### **Песнь 5**

**Ирмос:** Вскую мя отринул еси / от лица Твоего Свете незаходимый, / и покрыла мя есть чуждая тьма окаяннаго; / но обрати мя, и к свету заповедей Твоих / пути моя направи, молюся.

**Припев:** Слава Господи святому Воскресению Твоему.

Одеятися претерпел еси в багряницу прежде страсти Твоя Спасе, поругаемь, первозданнаго покрывая безобразное обнажение: и наг пригвоздился еси на Кресте плотию, совлачая Христе, ризу умерщвления.

**Припев:** Слава Господи святому Воскресению Твоему.

От персти смертных, Ты падшее мое паки наздал еси существо, воскрес: и нестареющееся Христе устроил еси, явив паки якоже царский образ, нетления жизнь блистающ.

**Припев:** Пресвятая Богородице спаси нас.

**Богородичен:** Матернее дерзновение, еже к Сыну Твоему имущи Всечистая, сроднаго промысления, еже о нас, не презри, молимся: яко Тебе и Едину христиане ко Владыце очищение милостивно предлагаем.

## **Ин, Кресту :**

**Ирмос:** Просвети нас повелении Твоими, Господи, / и мышцею Твоею высокою / Твой мир подаждь нам, Человеколюбче.

**Припев:** Слава Господи Кресту Твоему честному и Воскресению.

Настави нас силою Креста Твоего Христе: тем бо Тебе припадаем, мир подаждь нам Человеколюбче.

**Припев:** Слава Господи Кресту Твоему честному и Воскресению.

Окорми живот наш, яко Преплагий поющих Твое востание, и мир подаждь нам Человеколюбче.

**Припев:** Пресвятая Богородице спаси нас.

**Богородичен:** Умоли Чистая, Сына Твоего и Бога нашего, Неискусобрачная Марие Пречистая, еже низпослати нам верным велию милость.

## **Ин, Богородице :**

**Ирмос:** Утреннююще, вопием Ти:

**Припев:** Пресвятая Богородице спаси нас.

Утоли нестерпимую бурю страстей моих, Яже Бога рождшая Окормителя и Господа.

**Припев:** Пресвятая Богородице спаси нас.

Служат рождеству Твоему Пречистая Богородице, ангельстии чинове, и человекоев собрание.

**Припев:** Пресвятая Богородице спаси нас.

Марие Богородице Безневестная, упования врагов осуети, и поющыя Тя возвесели.

## **Песнь 6**

**Ирмос:** Очисти мя Спасе, / многа бо беззакония моя, / и из глубины зол возведи, молюся: / к Тебе бо возопих, и услыши мя, / Боже спасения моего.

**Припев:** Слава Господи святому Воскресению Твоему.

Древом крепко низложи мя началозлобный: Ты же Христе, вознесся на Кресте, крепчае низложил еси, посрамив сего, падшаго же воскресил еси.

**Припев:** Слава Господи святому Воскресению Твоему.

Ты ущедрил еси Сиона, возсиявый от гроба, новаго вместо ветхаго совершив, яко Благоутробен, Божественною Твоею кровию: и ныне царствуеши в нем во веки, Христе.

**Припев:** Пресвятая Богородице спаси нас.

**Богородичен:** Да избавимся от лютых прегрешений, мольбами Твоими Богородительнице Чистая, и да улучим Пречистая Божественное сияние, из Тебе неизреченно воплощенного Сына Божия.

**Ин, Кресту :**

**Ирмос:** Молитву пролию ко Господу:

**Припев:** Слава Господи Кресту Твоему честному и Воскресению.

Длани на Кресте распростерл еси, исцеляяй неудержанно простертую во Едеме руку первозданнаго: и Твоею волею желчи вкусив, и спасл еси Христе яко Силен, славящя Твоя страдания.

**Припев:** Слава Господи Кресту Твоему честному и Воскресению.

Смерти Избавитель вкуси, древняго осуждения, яко да и тления царство разрушит, и во адская сшед, воскресе Христос, и спасе яко Силен поющя Его воскресение.

**Припев:** Пресвятая Богородице спаси нас.

**Богородичен:** Не престай за ны молящи Пречистая Богородице Дево, яко верным утверждение Ты еси: надеждою Твоею крепимся, и любовьию Тя, и из Тебе воплощенного неизреченно славим.

**Ин, Богородице :**

**Ирмос:** Ризу мне подаждь светлу:

**Припев:** Пресвятая Богородице спаси нас.

Храм Тя Божий и Ковчег, и чертог одушевленный, и дверь небесную, Богородице вернии возвещаем.

**Припев:** Пресвятая Богородице спаси нас.

Требищ разрушитель яко Бог, бывшее рождество Твое Марие Богоневесто, покланяемо есть со Отцем и Духом.

**Припев:** Пресвятая Богородице спаси нас.

Слово Божие Тебе земным, Богородице, показа Небесную Лествицу: Тобою бо к нам сниде.

**Кондак, глас 8:**

**Подобен:** Яко начатки:

Воскрес из гроба, умершяя воздвигл еси, и Адама воскресил еси, и Ева ликует во Твоем воскресении, и мiрстии концы торжествуют, еже из мертвых востанием Твоим, Многомилостиве.

**Икос:** Адова царствия пленивый, и мертвыя воскресивый, Долготерпеливе, жены мироносицы сретил еси, вместо печали радость принесый: и апостолом Твоим возвестил еси победительная Спасе мой знамения Живодателю, и тварь просвещаеши Человеколюбче. Сего ради и мир срадуется, еже из мертвых востанию Твоему Многомилостиве.

### **Песнь 7**

**Ирмос:** Божия низхождения огонь устыдися в Вавилоне иногда: / сего ради отроцы в печи радованною ногою, / яко во цветнице ликующе пояху: / благословен еси Боже отец наших.

**Припев:** Слава Господи святому Воскресению Твоему.

Славное истощание, Божественное богатство Твоя нищеты Христе, удивляет ангелы, на Кресте зрящия Тя пригвождаема, за еже спасти верою зовущия: благословен еси Боже отец наших.

**Припев:** Слава Господи святому Воскресению Твоему.

Божественным Твоим сошествием света исполнил еси преисподняя, и тьма прогнана бысть прежде гонящая. Отнюдуже воскресоша иже от века юзницы, зовущие: благословен Бог отец наших.

**Припев:** Благословим Отца и Сына и святого Духа Господа.

**Троицен:** Всем убо Господа, Единого же Единородному Сыну православно Отца, богословяще Тя возвещаем, и Единого ведяще от Тебе исходяща Духа Праваго, Соестественна и Соприсносушна.

### **Ин, Кресту :**

**Ирмос:** От Иудеи дошедше:

**Припев:** Слава Господи Кресту Твоему честному и Воскресению.

Спасение соделал еси посреде вселенныя, пророчески Боже: на древо бо вознесен быв, вся призвал еси верою зовущия: отец наших Боже благословен еси.

**Припев:** Слава Господи Кресту Твоему честному и Воскресению.

Воскрес от гроба, якоже от сна Щедре, всех избавил еси от тли, тварь же уверяется апостолы проповедающими востание: отцев Боже благословен еси.

**Припев:** Пресвятая Богородице спаси нас.

**Богородичен:** Равнодетельное Рождшему, Равносильное Слово и Соприсносушное, во утробе Девы, Отца благоволением, и Духа, созидается: отцев наших Боже благословен еси.

## **Ин, Богородице :**

**Ирмос:** От Иудеи дошедше:

**Припев:** Пресвятая Богородице спаси нас.

От Девственных ложесн воплощься, явился еси на спасение наше. Темже Твою Матерь ведяще Богородицу православно зовем: отцев Боже благословен еси.

**Припев:** Пресвятая Богородице спаси нас.

Жезл прорастила еси Дево, от корене Иессеова Всеблаженная, Плод цветоносящи спасительный, верую Сыну Твоему зовущим: отцев Боже благословен еси.

**Припев:** Пресвятая Богородице спаси нас.

Премудрости исполни всех и силы Божественная, Ипостасная Премудросте Вышняго, Богородицею, верую Тебе поющих: отцев наших Боже благословен еси.

## **Песнь 8**

**Ирмос:** Седмерицею пещь / халдейский мучитель / богочестивым неистовно разжже, / силою же лучшею спасены сия виде, / Творцу и Избавителю вопияше: / отроцы благословите, / священницы воспойте, / людие превозносите во вся веки.

**Припев:** Слава Господи святому Воскресению Твоему.

Иисусова Божества Пребожественная сила, в нас боголепно возсияла есть: плотию бо вкуш за всех смерть крестную, разруши адову крепость. Егоже непрестанно дети благословите, священницы воспойте, людие превозносите во вся веки.

**Припев:** Слава Господи святому Воскресению Твоему.

Распныйся воста, великовыйный паде, падый и сокрушенный исправися, тля отвержена бысть, и нетление процвете: Жизнью бо мертвенное пожерто бысть. Дети благословите, священницы воспойте, людие превозносите во вся веки.

**Припев:** Благословим Отца и Сына и свягаго Духа Господа.

**Троицен:** Трисветлое Божество, Едину сияющее зарю от Единого Триипостаснаго Естества, Родителя Безначальна: Единоестественно же Слово Отцу, и Сцарствующаго Единосущнаго Духа, дети благословите, священницы воспойте, людие превозносите во вся веки.

## **Ин, Кресту :**

**Ирмос: Победители мучителя:**

**Припев: Слава Господи Кресту Твоему честному и Воскресению.**

На древе руце мне простершаго обнаженному, призывающа мя, Своею благообразною согрести наготою: благословите вся дела Господня, и превозносите Его во веки.

**Припев: Слава Господи Кресту Твоему честному и Воскресению.**

Из преисподняго ада вознесша мя падшаго, и высокопрестольною славою Родителя почетшаго: благословите вся дела Господня Господа, и превозносите Его во веки.

**Припев: Пресвятая Богородице спаси нас.**

**Богородичен: Адама Дево, падшаго убо явилася еси Дщи, Бога же Мати, обновившаго мое существо: Егоже поем вся дела яко Господа, и превозносим во вся веки.**

## **Ин, Богородице :**

**Ирмос: Царя Небеснаго:**

**Припев: Пресвятая Богородице спаси нас.**

Сопротивных разжженныя и пламеновидныя на нас угаси стрелы: яко да поем Тя во вся веки.

**Припев: Пресвятая Богородице спаси нас.**

Преестественне Содетеля и Спаса, Бога Слова родила еси Дево: темже Тя поем, и превозносим во вся веки.

**Припев: Пресвятая Богородице спаси нас.**

Просветительную Тя, и Златозарную, всельшийся в Тя Свет Непрístupный Дево, показа свещу во вся веки.

**Таже поем песнь Богородицы: Величит душа моя Господа: С припевом: Честнейшую херувим:**

## **Песнь 9**

**Ирмос: Ужасеся о Сем небо, / и земли удивишася концы, / яко Бог явися человеком плотски, / и чрево Твое бысть пространнейшее небес. / Тем Тя Богородицу, / ангелов и человек чиноначалия величают.**

**Припев: Слава Господи святому Воскресению Твоему.**

Божественным и Безначальным Естеством прост сый, сложился еси приятием плоти, в Тебе Самом Сию составив Слове Божий, и пострадав яко человек, пребыл еси кроме страстей яко Бог. Темже Тя во Двою Существо нераздельно и неслиянно величаем.

**Припев:** Слава Господи святому Воскресению Твоему.

Отца по Существу Божественному, якоже естеством быв человек, рекл еси Бога Вышний рабом снизходя, воскрес от гроба, благодатию Отца земнородным полож, иже по естеству Бога же и Владыку, с Нимже Тя вси величаем.

**Припев:** Пресвятая Богородице спаси нас.

**Богородичен:** Явилася еси, О Дево Мати Божия, паче естества рождши плотию Бога Слова, Егоже Отец отрыгну от сердца Своего прежде всех век, яко Благ, Егоже ныне и телес превышша разумеем, аще и в тело облечеса.

**Ин, Кресту :**

**Ирмос:** Устрашися:

**Припев:** Слава Господи Кресту Твоему честному и Воскресению.

Божия Тя естеством убо Сына, зачатого во утробе свемы Богоматере, и бывшего нас ради Человека, и зряще Тя на Кресте естеством убо страждуща человеческим, безстрастна же яко Бога пребывающа величаем.

**Припев:** Слава Господи Кресту Твоему честному и Воскресению.

Разрушися тьма дряхлая, от ада бо возсия Солнце Правды Христос, земли просвещая вся концы, сияя Божества светом, Небесный Человек, Бог земный: Егоже во двою естеству величаем.

**Припев:** Слава Господи Кресту Твоему честному и Воскресению.

Напязи, и успевай, и царствуй, Сыне Богоматере, исмаильтеския люди покаяря, борющыя ны, яко оружие непобедимое, приходящим к Тебе Крест с копием даруя.

**Ин, Богородице :**

**Ирмос:** Воистинну Богородицу / Тя исповедуем / спасеннии Тобою Дево Чистая, / с безплотными лики Тя величающе.

**Припев:** Пресвятая Богородице спаси нас.

Радости и веселия исполнь есть память Твоя, приступающим исцеления точащи, и благочестно Богородицу Тя возвещающим.

**Припев:** Пресвятая Богородице спаси нас.

Псалмы Тя воспеваем Благодатная, и немолчно, еже радуйся, приносим: Ты бо источила еси всем радость.

**Припев:** Пресвятая Богородице спаси нас.

Красен Богородице прорасте плод Твой, не тли причащающимся ходатайствен, но жизни, верою Тя величающим.

**По катавасии ектенна малая.**

**Таже, Свят Господь Бог наш. Посем екзапостиларий.**

## На хвалитех стихиры воскресны, глас 8:

**Стих:** Сотворити в них суд написан \* слава сия будет всем преподобным Его.

Господи, аще и судилищу предстал еси / от Пилата судимый, / но не отступил еси от престола / со Отцем седя: / и воскрес из мертвых, / мир свободил еси от работы чуждаго, / яко Щедр и Человеколюбец.

**Стих:** Хвалите Бога во святых Его \* хвалите Его в утверждении силы Его.

Господи, оружие на диавола Крест Твой дал еси нам: / трепещет бо и трясется, / не терпя взирати на силу его: / яко мертвые возставляет, / и смерть упраздни. / Сего ради покланяемся погребению Твоему / и востанию.

**Стих:** Хвалите Его на силах Его \* хвалите Его по множеству величества Его.

Господи, аще и яко мертва / во гробе иудеи положиша: / но яко Царя спяща воины Тя стрежаху, / и яко живота сокровище, / печатью печаташа: / но воскресл еси, и подал еси нетление / душам нашим.

**Стих:** Хвалите Его во гласе трубнем \* хвалите Его во псалтири и гуслех.

Ангел Твой Господи, / Воскресение проповедавый, / стражи убо устраши, / женам же возгласи глаголя: / что ищете Живаго с мертвыми; / воскресе Бог сый, / и вселенней жизнь дарова.

## Ины стихиры Анатолиевы, глас тойже.

**Стих:** Хвалите Его в тимпане и лиц \* хвалите Его во струнах и органе.

Пострадал еси Крестом, / Безстрастный Божеством, / погребение приял еси тридневное, / да нас свободиши от работы вражия, / и обезсмертив оживотвориши нас Христе Боже, / воскресением Твоим Человеколюбче.

**Стих:** Хвалите Его в кимвалех доброгласных \* хвалите Его в кимвалех восклицания: всякое дыхание да хвалит Господа.

Покланяюся, и славлю, / и воспеваю Христе Твое из гроба Воскресение, / имже свободил еси нас от адовых нерешимых уз: / и даровал еси миру яко Бог жизнь вечную, / и велию милость.

**Стих:** Воскресни Господи Боже мой \* да вознесется рука Твоя, не забуди убогих Твоих до конца.

Жизноприемнаго / Твоего гроба стрегуще законопреступнии, / с кустодиею запечаташа тогда: / Ты же яко Безсмертен Бог и Всесилен, / воскресл еси тридневен.

**Стих:** Исповемся Тебе Господи всем сердцем моим \* повем вся чудеса Твоя.

Дошедшу Ти во врата адова, Господи, / и сия сокрушившу, / пленник сие вопияше: / кто Сей есть, яко не осуждается в преисподних земли, / но и яко сень разруши смертное узилище; / приях Того яко мертва, / и трепещу яко Бога. / Всесильне помилуй нас.

## **Слава, стихира евангельская.**

### **И ныне:**

**П**реблагословенна еси Богородице Дево, / воплощим бо ся из Тебе ад  
пленися, / Адам воззвася, клятва потребися, / Ева свободися, / смерть умертвися,  
и мы ожихом, / тем воспевающе вопием: / благословен Христос Бог  
благоволивый тако, славо Тебе.

### **Славословие великое.**

### **Таже, тропарь воскресен:**

**В**оскрес из гроба, / и узы растерзал еси ада, / разрушил еси осуждение смерти  
Господи, / вся от сетей врага избавивый: / явивый же Себе апостолом Твоим, /  
послал еси я на проповедь, / и теми мир Твой подал еси вселенней, / едине  
Многомилостиве.

### **Таже ектении: и отпуст.**

## НА ЛИТУРГИИ

### Изобразительная, блаженна, глас 8:

**Помяни нас, Христе Спасе мiра, якоже разбойника помянул еси на древе: и сподоби всех Едине Щедре, Небесному Царствию Твоему.**

**Стих: Блажени чистии сердцем, яко тии Бога узрят.**

**Слыши Адаме, и радуйся со Евою: яко обнаживый прежде обоя, и прелестию взем вас пленники, Крестом Христовым упразднися.**

**Стих: Блажени миротворцы, яко тии сынове Божии нарекутся.**

**На древе пригвожден быв Спасе наш волею, яже от древа клятвы Адама избавил еси, воздая яко Щедр еже по образу, и райское селение.**

**Стих: Блажени изгнани правды ради, яко тех есть Царство Небесное.**

**Днесь Христос воскрес от гроба, всем верным подая нетление, и радость обновляет мвроносицам по страсти и Воскресении.**

**Стих: Блажени есте, егда поносят вам, и изженут, и рекут всяк зол глагол на вы лжуще Мене ради.**

**Радуйтесь мудрыя жены мвроносицы, первыя Христова Воскресение видевшы, и его возвестившы апостолом, всего мiра воззвание.**

**Стих: Радуйтесь и веселитесь, яко мзда ваша многа на небесех.**

**Друзи Христовы апостоли явльшеся, сопрестольни Его славе быти имуще, со дерзновением Тому нам предстати, яко ученицы Его молитесь.**

**Слава, Троичен: Безначальная Троице, Нераздельное Существо, Сопрестольная Единице, Единочестная славою, Прена начальное Естество и Царство, спасай иже верою воспевающих Тя.**

**И ныне, Богородичен: Радуйся, Божие пространное Вместилище: радуйся, Ковчеже новаго завета: радуйся, ручко, из Неяже манна всем дадеся небесная.**

### Прокимен, глас 8:

**Прокимен: Помолитесь, и воздадите \* Господеви Богу нашему.**

**Стих: Ведом во Иудеи Бог, во Израили велие Имя Его.**

**Аллилуиа: Приидите, возрадуемся Господеви, воскликнем Богу Спасителю нашему.**

**Стих: Предварим лице Его во исповедании, и во псалмех воскликнем Ему.**